

PRIMERA CARTA DEL APOSTOL

SAN PEDRO

1 ¹Wejrtča Pedrutqui, Jesucristuž uchta apostoltqui. Jalla nižtiquiztan ančhucaquin tii cartal cijjržcuča. Ančhucqui persun wajtquiztan wichanzinčhucča wacchi yekja provincianac kjutñi, Ponto, Galacia, Capadocia, Asia, Bitinia, jalla nii provincianacquin ojkchinčhucča. Jakziquint ojektčhaja, jalla nicju kamča; ana persun wajtquiz kamča ančhucqui. ²Yooz Ejpqui ančhuc illziča, niiz partiquiz cjisjapa. Niiž tuquita pinsita jaru ančhuc illziča. Nižaza Espíritu Santuqui ančhucaquiz zuma kamañchiz cjiskatchiča, ančhuc Jesucristuž kuzcama kamajo. Jesucristuž ticziž cjen ančhuca ujnacaqui pertuntača. Jaziqui ančhucča Yooz wajtchiz žoñinacaqui. Yoozqui ančhucaquiz zumaj yanapt'ila, nizaza ančhucaquiz walikaj kamkatla.

EW KAMAÑCHIZ PUNTU

³Učhum Jesucristo Jilirž Yooz Ejpqui honorchizkaj cjila. Yooz Ejpqui zuma okzñi kuzziz cjen učumnacaquiz ew kamaña tjaachiča. Jesucristuž ticžcu jacatattiquiztan Yoozqui učumnacaquiz ew kamaña tjaachiča. Ew kamañchiz cjican učumqui tjewža arajpachquin Yooztan chica kamzjapa. ⁴Nižaza ew kamañchiz

cjican učumqui Yooz tjaata irinsa tanznaquiča arajpachquin. Učhum irinsača arajpachquin Yooztan kamzqui. Anaž čhjul anawalinacami nekz želasača. Nii Yooz irinsaqui učumnacaltajapa chjojtača. Jalla nižtiquiztan nii irinsaqui anaž jecmi akasača. Tsji ew zquitiqi manchita cjesača. Nižaza tsji c'achja pjajkjallaqui chooča. Ančhuca arajpachquin chjojta irinsaqui ana nižta cjesača. ⁵Arajpachquin ančhucaltajapa tsji ancha zuma kamzqui tjacžtača. Jesucristuž tjonz tjuñquiziqui nii zuma kamzqui tjeežta nižaza tjaata cjequiča. Pero anziqi tii muntuquiz želan, nižaza ančhuc Yoozquin kuzziz cjen, Yoozqui niiz aztan ančhuc cuitaquiča.

⁶Jalla niztiquiztan ančhucqui zuma cuntintu kuzzizčhucča. Pero tii anza timpuquiz ančhucaltaqui anawalinacaž tjonchiž cjen llaquisauquiča. Tii muntuquiz želan ančhucqui pruebanaca watča. Nuž cjenami Yooz Ejpča ančhuc cuitiñiqui, nižaza liwriiñiqui. Jaziqui cuntintuž cjee. ⁷Ančhuca kuzqui pruebanacžtan yanztača, ultimu Yoozquin kuzziz, ultimu ana Yoozquin kuzziz, jalla nii tjeežta cjisjapa. Jakziltat pruebanacžquiztan sufranami

tirapan Yoozquin tjurt'ichižlaja, jalla nižta kuzziz žoñiqui ancha valorchizza, c'achja kor paazquiztan cjen juc'anti. Čhjul c'achjanacami anaž tjurča, akzñipanikazza. Korimi ujquiz t'azinta cjenacui, jiñipanikazza. Nekztan pjalzñiča ana walinaca. Pero zuma pjalžta korimi ana tjurñipanikazza. Yoozquin kuzzizpan žoñinacui anača nižtažtakaz. Antiz tjurñipanikazza. Ančhucča Yoozquin lijitum kuzzizqui. Jalla nižtiquiztan Yooz Ejpqui ančhuc zuma risiwaquičha, nižaza honoraž tjaaquičha, Jesucristo wilta tjonz tjuñquiziqui.

⁸Ančhucqui Jesucristužtan munaziča, kjažta ana cheržcumi. Nižaza ana cheržcumi nižžquin kuzzizza. Jalla nižtiquiztan ančhucqui ancha cuntintuž chipža. Žoñž takunacžtan učhum cuntintu kuz puntuquiztan ana zuma intintaskati atasacha. Nižta cuntintu kuzqui Yoozpachaž chipskatča. ⁹Ančhucqui Yoozquin kuzzizpanča. Jalla nižtiquiztan ancha zuma kamañchizza. Wiñaya Yooztan walikaz kamča.

¹⁰Yoozqui nižž okžni kuzziz cjen ančhucquiz yanapča nižžtan zuma kamajo. Učhumnacaltajapača nii Yooziž yanaptaqui. Jalla nii Yooziž yanaptaqui mazinchiča tuquita profetanacui. Nii Yooztajapa chiiñi profetanacui Yooztan kamz puntu walja istutichiča nii puntu iya iya zizjapa. Walja kuzquiz pinsichiča tsjan zuma intintajo. ¹¹Cristuž Espíritu Santuqui profetanacž kuzquiz zizkatchiča, jalla tuž: Yooziž cuchanžquita Cristuqui sufraquičha; nižaza sufrizcu walja honorchiz cjequičha. Jalla nii puntunaca profetanacui zizkattatača. Pero tsjan kjana ziz pecatča, čhjulorat Cristo tjonaquejo, nižaza jaknužt

nižž tjonz wataquejo? Jalla nii zizjapa ancha pinsatča. ¹²Espíritu Santuqui tuquita profetanacžquiz Yooz pinsitanaca zizkatchiča, učhumnacauiz maznajo. Anatača ninacžtajapakaz nii zizkattaqui, antiz učhumnacaltajapazakaz. Jaziqui anzta timpuquizkaz nii tuquita mazintaqui kjanapacha kjanzt'iča. Liwriiñi Yooz taku paljayñi žoñinacacha nii puntunaca kjanzt'iñinacui. Espíritu Santuqui arajpachquiztan cuchanžquitača, kjanzt'iñi žoñinaca yanapzjapa. Jalla nii kjanzt'ita puntuquiztanacui arajpachquin žejlñi anjilanacami juc'ant intintazñi pecča.

¹³Jalla nii puntunacquiztan chiižcu, jalla tuž ančhucquin chiižinz pecučha. Zumpacha tantiya, zuma razunžtan. Ewjt'iñi kuzziz cjee. Tjapa kuztan tjewža, Yooz irata zuma kamañchiz cjisjapa. Jalla nižta zuma kamaña ančhucquiz tjaaquičha Yoozqui, Jesucristuž tjonz tjuñquiz. ¹⁴Ančhucča Yooz zuma cazñi maatinacui. Jaziqui zuma kamañchiz cjee. Ima Yooz maati cjican, tuquita ana wali paaz pecñi kuz jaru kamchinčhucča. Yooz kamaña ana pajchinčhucča. ¹⁵Jaziqui, Yooz maati cjican, nižta ana wali pecñi kuz mantuquiz ana cjiskata. Anziqui čhjul paacanami zuma kamañchizkaz cjee, jaknužt ančhuc kjawzñi Yoozqui zuma kamañchizpanžlaja, jalla nižta. ¹⁶Yooz tawk liwruquiz Yooz Ejpqui tuž cjiča: “Wejrqui zuma kamañchizpankaztča. Jalla nižtiquiztan ančhuczakaz zuma kamañchiz cjee”.

¹⁷Ančhucqui, Yooz maatinaca cjican, mayiziča, “Wejt Ejpča” cjican. Ančhucqui, nižžquinkaz rispitan, tii muntu yokquiz zuma kamzpan waquiziča, arajpachquin ojkcama. Yooz Ejpqui ana illillžcu pjalznaquičha.

Zapa mayniqui paatiquiztan jama pjalžta cjequiča. ¹⁸ Cjuñzna ančhucui. Tuquiqui ančhucui tuquita ejpnacaž tjaajinta kamañchiztača. Inapankaz kamchinčhucča. Jalla nii ana walni kamañquiztan liwriitača. Nii liwriiñiž puntuquiztanaqui tantiya. Anaž čhjul koržtanami, nižaza anaž paaztanami, nižaza anaž čhjul tucuziñi cusasanacžtanami pacžcu, liwriitacha ančhucui. ¹⁹ Antiz Jesucristuž ancha walurchiz ljocžtan liwriitača. Jesucristuqui conta cjissiča, walipunt uua wilanažtakaz, zuma lllumpaka. Jalla nižta zuma ljocžtan ančhucui liwriitača. ²⁰ Ima tii muntu paacan Yoozqui Jesucristo utchiča, tii muntuquiz žejlñi žoñinaca liwriizjapa. Anzta timpuquizkaz Jesucristuqui tjonchiča; ančhucaltajapa žoñi tucchiča. ²¹ Jesucristuž cjen ančhucui Yoozquin kuzziz žejlča. Yoozqui Jesucristo ticziquiztan jacatatskatchiča; nekztan zuma honorchiz cjiskatchiča, ančhuc nižquin kuzziz cjisjapa, nižaza arajpachquin kamz tjewžni kuzziz cjisjapa. ²² Jaziqui ančhucui lijitum Yooz tawkquiz cassinčhucča Espíritu Santuž yanapchiž cjen. Jalla nuž Yooz tawkcama kamtiquiztan ančuca kuznacaqui ana ujchiz cjissiča Yooz yujcquiz. Nižaza parti criichñinacžtan zuma munaziñi kuzziz cjissiča. Jalla nižtiquiztan tirapan porapat ancha tjapa kuztan zuma munaza. ²³ Ančhucui užca nassi wawažtakaz ew kamañchizta. Ančuca ew kamañaqui anača ticzi ejpnacžquiztan. Antiz žejtñi Yooz Ejpžquiztanča, niž taku catoktiquiztan. Yooz takuča ew kamañchiz cjiskatñi; nižaza Yooz takuqui wiñayjapa tjuraquiča. ²⁴ Jalla

nii puntuquiztan Yooz takuqui tuž cjiča:

“Tjapa žoñinacaqui pastunacažtakazza. Tjapa žoñinacaž pajk obranacaqui pastunacž pjajkjallažtakazza. Tsjii timpukaz tjurasacha. Jaknužt pastunacaqui tsjii timpukaz žejlčhaja, jalla nižta tsjii kjaž watanacakaz žoñinacaqui kamča; nekztan ticža. Nižaza pastunacž pjajkjallanacaqui ratulla choočha, jalla nižta irataž žoñiž paata pajk obranacaqui anaž tjurasacha. ²⁵ Pero Yooz Jilirž takuzti wiñayjapa tjuraquiča”.

Jalla nii Yooz takuča liwriiñi takuqui. Jalla nii liwriiñi taku ančucaquiz paljaytatača.

2 ¹ Jalla nii taku catokžcu zuma kamañchizpan cjee. Tjapaman ana wali paaznaca eca. Nižaza pisc kuzziz cjecisnaca eca. Nizaza ana incallz pecñi kuzziz cjee. Nižaza ana zmazñi kuzziz cjee. Nižaza anawali chiichiiznaca eca. ² Ančhucui Yooz taku ancha pecz waquiziča, jaknužt tsjii užca nassi wawaqui piz itz pecčhaja, jalla nižta Yooz taku pecñi kuzziz cjis waquiziča. Nekztanaqui Yooz taku juc'anti zizñi zizñi kuzziz cjen, juc'ant zuma kamañchiz cjisnaquiča. ³ Jesucristo Jiliriqi zumapanča. Jalla nii naazinčhucča. Jaziqui Yooz taku juc'ant juc'ant zizñi cjee.

JESUCRISTUČHA CHEKAN MAZTAKAZ

⁴ Jesucristo Jiliržquiz macjata. Niiča ew kamaña tjaañiqui. Jesucristučha žejtñimi, nižaza žejtkatñimi. Jalla niiča, žejtñi maz cjitaqui. Žoñinaca nii maz ana pecchiča. Yoozti nii maz

illziċha; niižtajapa ancha walurchizza.

⁵Nii žejtni maz cjita Jesucristuž cjen, anċhuczakaz Yooz žeti tanzinċhucċha. Jaziqui anċhuczakazza žejtni maznacažtakaz. Jaknužt maznacžtan kjuya pirkichaja, jalla nižta Yoozqui anċhucatan niž kjuya kjuytažokaz cjiċha. Anċhucċha Yooz kjuychiz žoñinacaqui. Nižaza anċhucqui t'akžtaċha Yooztajapa sirwiñi. Nižaza anċhucqui persun kuznaca Yoozquin tjaacċha ofrendanacažtakaz. Nižaza Jesucristuž cjen Yoozqui anċhucaž tjaata kuznaca asiptasaċha. ⁶Jesucristuċha maz cjitaqui. Jalla nii puntuquiztan cijjrta Yooz takuqui tuž cjiċha:

“Wejrqui tsjii simint maz tjulznucċha Siñ cjita arajpach wajtquin. Jalla nii mazqui juc'ant chekanċha tjapa parti maznacquižtan. Nii mazqui Yooziž illžtaċha, nižaza Yooztajapa wali walurchizza. Jequit nii walurchiz maz cjita Jesucristužquin kuz tjaacċhaja, jalla ninacaqui anapanž amulasaquiċha. Anapanž inapankaz cjesaċha”.

⁷Maz cjita Jesucristuqui walja walurchizza, anċhuc criichinacžtaqui. Pero ana criichi žoñinacatqui nii maz ana walurchiztakaz nayċha. Cijjrta Yooz takuqui tuž cjiċha:

“Kjuyni žoñinacaqui tsjii maz ana pecchiċha. Jalla nii ana pecta mazpacha zuma chekan maz cjissiċha”.

⁸Nižaza cijjrta Yooz takuqui tuž cjiċha: “Nii maz cjen žoñinacaqui t'ejžcu, ujquiz tjojtsnaquiċha”.

Ana criichi žoñinacaqui Yooz taku ana juyzu paaċha. Nekztan sufriskattapanž cjequiċha. Jalla nižtajapa Yoozqui ninaca utchiċha.

⁹Pero anċhuczi anaċha nižta. Antiz anċhucqui Yooziž illžtaċha. Jaziqui anċhucċha Yooz maatinacaqui. Yooz Jiliržquiz sirwizjapa, t'akžtaċha. Anċhucċha Yooz wajtchiz žoñinacaqui. Jalla nuž cjisjapa illžtaċha anċhucqui. Nižaza anċhucqui illžtaċha Yooz ispantichuca obranaca paljayzjapa. Anawal zumchiquiz kaman Yoozqui anċhuc kjawziċha, niž ancha zuma jiczquiz luzkatzjapa, niž kjanquiz kamzjapa. ¹⁰Tuquiqui anċhucqui anataċha Yooz watja. Anziċha Yooz wajtchiz žoñinacaqui. Tuquiqui anċhucqui Yooziž ana okžtataċha. Anziċha Yooziž okžtaqui.

JILIRINACŽQUIZ RISPITA

¹¹Pecta jilanaca, cullaquinaca, tii muntuquiz kamcan anċhucqui istrañiñċhucċha. Yooz wajtchiz žoñinacaċha anċhucqui. Jaziqui chiižinžcuċha, anawali pecni kuz ana juyzu paa. Nii anawali pecznacaqui anċhuca persun kuz animu quintraċha. ¹²Ana Yooz pajni žoñinacžtan kamcan, anċhucqui zumapan kama. Ana Yooz pajni žoñinacaqui anċhuca quintra chiyaċhani. Nižaza uj paañinacažtakaz anċhuc nayaċhani. Jalla nižta quintra cjiicjiyanami, anċhucqui zuma kamz waquiziċha, ninaca anċhucaž zuma paatanaca chertzjapa. Jalla nuž cheržcuqui ninacaqui Yoozquin honora tjaaquičha ultim pjalz tjuñquiziqui.

¹³Jilanaca, cullaquinaca, nonžna. Jesucristo Jiliržquiz sirwican tjapa žoñiž nombrita jilirinacžquiz casa. Chawc mantiñi jiliržquiz casa. ¹⁴Nižaza niž cuhanžquita jilirinacžquiz casa. Nii jilirinacaqui cuhanžquitaċha, anawali paañi žoñinaca casticajo, nižaza zuma paañi žoñinacžquiz honora tjaajo. ¹⁵Yoozqui pecċha, anċhuc zuma kamzjapa. Jalla

nižta zuma kamcan, ančhucqui zumzu anawali kamañchiz žoñinacžquiz ch'ujuž cjiskataquičha.

¹⁶Yooz liwriita žoñinaca cjicanaqui zuma kama. Pero liwriita cjicanaqui anačha pinzizqui ana walinaca paaznacžquiz. Antiz zuma kama Yooz piyunažta. ¹⁷Tjapa žoñinacžquiz rispita. Tjapa criichi žoñinacžtan zuma munaza. Yoozquin rispita. Nižaza chawc mantiñi jiliržquiz honora tjaa.

SUFRICAN YOOZQUIN KUZIZZ CJEE

¹⁸Piyunanaca, ančhucqui patrunanacž mantuquiz cjee, ninacžquiz rispitan. Zuma kuzziz, nižaza okžni kuzziz patrunchizlaj niiqui, niž mantuquiz cjee. Nižaza ana zuma patrunchizlaj niiqui, niž mantuquiz zakaz cjee. ¹⁹Tsjii piyunaqui zuma langžni cjenami wjajttaž cječhani. Pero pasinziz kuztan awantiz waquizičha. Jalla nii piyunaqui nuž sufrican cjuñž waquizičha, ničha ultimu Yooz piyunaqui, jalla nii. Jalla nuž sufrizcu zuma kuz tjeeža; nekztan Yooz yujcquiz ancha cuza cjitaž cjequičha.

²⁰Tii muntuquiz kamcan ančhucqui anawali paatiquiztan castictaž cječhani. Pasinziz kuztan awantaquiz niiqui, čhjul honorat tjaata cjesajo? Pero zuma paatiquiztan sufriskattaž cjequiz niiqui, nižaza ančhucqui pasinziz kuztan awantaquiz niiqui, Yooz yujcquiz honorchiz cjequičha.

²¹Jalla nižta pasinziz kuzziz sufraquiz niiqui, kjana tjeeža, Jesucristuž žoñinacčhucčha, nii. Yoozqui ančhuc kjawzičha, zuma kuz tjeezjapa. Cristuqui ančhuc laycu sufrichizakazza. Cristuqui sufrican ancha pasinziz kuz tjeezičha. Nižta irata ančhucqui sufrican, nižtazakaz pasinziz kuz tjeez waquizičha. ²²Jesucristuqui ana zinta

uj paachičha. Nižaza čhjul anawal takumi ana chiichipančha. ²³Cristuqui žoñinacaž ch'aanita cjenami, anapan chjaychičha. Nižaza Cristuqui sufrichi cjenami, anapan žoñi kitz pecchičha. Jalla nižta sufrican Cristuqui zizzičha, Yooz Ejpqui nii anazuma žoñinaca legali casticaquičha, jalla nii. Jesucristuqui zizzičha, anawali cjicjiñinacaž paatiquiztan jama casticta cjequičha, nii. Nižaza Yooz Ejpqui zuma kuzziz žoninacžquiz honora tjaaquičha. ²⁴Jesucristupachačha persun curpuquiz učhum ujnacquiztan sufrichiqui, cruzquiz ch'awcta.

Jalla nuž učhumnacalta laycu ticzičha, učhumnaca anawali ujnaca ecajo, nižaza Yooz tjaata zuma kamañchiz cjejajo. Jesucristuqui chjojrichta cjissičha, ančhuc čhetinta cjisjapa ančhuca ujnacquiztan.

²⁵Tuquiqui ančhucqui pasta uuzanacažtakaz ojklayatčha. Anziqui ančhucqui Arajpach Awatiržquiz quejpchinčhucčha, ančhuca kuz niž cuitita cjisjapa.

LUCUTJIŇI KAMZ PUNTU

3 ¹Maatakanaca, ančhucqui persun luctakž jaru kama. Tsjii luctakanacaqui Yooz taku ana criičha, nižaza Yooz tawk jaru ana kamčha. Pero ančhuc criichin maatakanacaqui zuma kamaña tjeez waquizičha. Ančhuca zuma kamaña tjeeztiquiztan, ančhuca ana criichi luctakanacaqui Yooz taku criichiž cječhani, ančhuc ana ancha tawkžtan atipchiž cjen. ²Nižaza ančhuca luctakanacaqui criyačhani ančhuca zuma kamtiquiztan, nižaza ančhuca rispitni kamtiquiztan. ³Zawnctan zquiti ist'asnacquiz anačha kuz tjaazqui. Persun c'achja chjijcžta ach charquiz, nižaza zquiti ist'asnacquiz,

nižaza ancha c'achja zquitinacquiz, jalla nižtanacquiz anača kuz tjaasqui.

⁴Antiz zuma c'achja kamañanacquiz kuz tjaa. Humilde kuzziz, nižaza llan kuzziz cjee. Jalla nižta kamañanacqui Yooz yujcquiziqui walja walurchizta. Ni zuma c'achja kamañacqui tsjii zuma tjurñi walurchiztakazza. ⁵Tuqui timpuqui Yooz partir maatakanacqui nižta c'achja kamañchiztača. Nii maatakanacqui Yoozquin kuzziztača. Nižaza luctakž jaru cjiicjiñitača.

⁶Jalla nižta Sara cjita cullaquiqui Abraham cjita lucžquiz cassinča, nižquiz "wejt jiliri" cjican. Ančhucqui nižta zuma kamañchiz cjequiz niiqui, Sara cullaca maatinacažtakaz cjequiča. Ana čjulquiztanami ančuca kuz turwayskata.

⁷Luctakanaca, ančucaquin zakaz chiižinžcuča. Ančhucqui persun maatakanacžtan zuma intintazñi munaziñi kuzziz kamaquiča. Yoozqui pucultan ančucaquiz niž zuma kamaña tjaachiča. Jalla nižtiquiztan jaknužt persun maatakžquiz rispitz waquizičaja, jalla nuž rispitaquiča. Cjuñzna, luctakaqui maatakžquiztan juc'ant azzizza. Persun maatakžtan zuma kamz waquiziča, ančucaž Yoozquiztan mayizitanaca ana ina cjejajo.

SUFRIS PUNTU

⁸Tsjiižtan zakal cjesača. Tjapa ančhucqui tsjii kuzziz kamaquiča. Nižaza criichinacpora zumaž munazaquiča. Nižaza okzñi kuztan kamaquiča. Nižaza humilde kuztan kamaquiča. ⁹Tsjiižuñ ančucaquiz anawali paachiž cjen ana nižtapacha anawali tjepnaquiča. Nižaza tsjiižuñ ančuca quintra ch'aananami, ana nižtapacha niž quintra ch'aaquiča. Antiz nižtajapa Yoozquiztan

mayizinaquiča, nii zuma cjiskatzjapa. Yoozqui ančhuc kjawziča, zumanaca tanzjapa. Jalla nižtiquiztan ančuca quintra žoñinacžtajapami Yoozquiztan mayizinaquiča, Yooz wintižta cjisjapa.

¹⁰Yooz takuqui tuž cjiča:

"Jakziltat zuma kamañchizpan pecčaja, nižaza cuntintupan kamz pecčaja, jalla niiqui persun chiiñi ata ewjt'istanča, anawal taku ana chiižjapa, nižaza ana incallñi toscar taku ana chiižjapa. ¹¹Nižaza jakziltat cuntintupan kamz pecčaja, anawali paaznacquiztan zarakstanča; nekztan zupapan paastanča. Parti žoñinacžtan wali kamzjapa, jalla nižtiquiz kuz tjaastanča. ¹²Yooz Jiliriqui zuma kamañchiz žoñinaca cuitiča. Nižaza ninacaž mayizitanaca nonža. Pero Yooz Jiliriqui anawali paañi žoñinacž quintrača.

¹³Ančucaž zuma kamznacquiz kuz tjaachiž cjen, žject ančuca quintra paasajo? ¹⁴Pero ančhucqui zuma kamcan sufraquiz niiqui, cuntintuž cjee. Yoozqui ančucaquiz honora tjaaquiča. Nii quintra žoñinacžquizimi ana eksna. Nižaza anaž jecžquiztanami kuz turwayskata. ¹⁵Cristupankazza ultim Jiliriqui. Jalla nižtiquiztan Cristužquiz ančhucqui rispitanča. Nižaza ančhucqui listu tjaczi žela, ančucaž Yooztajapa kamz puntuquiztan chiižjapa. Tsjii žoñi nii puntu pewcznaquiz niiqui, zuma razunžtan kjaaz waquiziča. Humilde kuzziz nižaza rispitiñi kuzziz kjaaz waquiziča. ¹⁶Zumaž kamaquiča. Nekztan ančuca kuzquiz anaž čjul ujmi cjuñznaquiča. Cristužquin kuzziz zumaž kama. Jalla nekztanaqui žoñinacaqui anaž ančuca quintra

chiyi atasacha. Ninacaqui anchuca
quina chiyauiz niqui, ultimu
azaquicha anchuca zuma kamtiqiztan.

¹⁷ Anchucui walikaz Yooz munañpi
jaru kamcan sufraçhaja, wintizta
cjequicha. Ana zuma kamtiqiztan
sufrauiz niqui, jalla niicha ana
waliqui; anaž Yooz munañpi jarucha
niqui.

¹⁸ Jesucristuqui uchum ujnac laycu
ticziça. Jalla nižtiqiztan uchum
ujnac laycu ana iya ticz pecça. Zuma
kamañchiz Cristuqui ana zuma
kamañchiz žoñinacž laycu ticziça,
ninacžquiz Yoozquin macjatskatzjapa.
Curpuchiz cjican contataça pero
niž animuqui tirapan žejtça. ¹⁹ Niž
espíritu animuqui chawctažtakaz
espíritu animunacžquin ojkcchitaça
Yooz puntu kjanzt'izjapa. ²⁰ Jalla nii
chawctažtakaz espíritu animunacaqui
tuquitanpacha Yoozquin ana cassiça.
Noež kamta timpuquiz Yoozqui
pasinziz kuzziz želatça nii tuquita
anawali žoñinacžtajapa. Jalla nuž
žejlcan Yoozqui Noežquiz tsjii pajk
kjuyaž cherchi warcu kjuykatchiça.
Nekztan Yoozqui nii warcuquiz tsjii
quinsakal žoñinaca luzkatchiça,
wacchi kjazquiztan žejtkatzjapa. ²¹ Jalla
nii kjazqui bautismožtakaztaça.
Anchuczakaz bautista cjican liwriitaça.
Ultim bautismuqui anaž curpu ajunça,
antiz ultim bautismuça Yoozquin
tjapa kuztan cjisqui, ujnacqiztan
pertunta cjisjapa, paata ujnacqiztan
ana iya cjuñzjapa. Jilanaca,
cullaquinaca, Jesucristuž jacatatchiž
cjen uchumqui liwriita cjesaça.

²² Jesucristuqui jacatatžcu arajpacha
ojkchiça. Jaziqini nicju Yooz Ejpž žew
latuquiz julzi žejlça. Nekz žejlcan
anjilanacami, nižaza jilirinacami nižaza
poderchiznacami Cristuž mantuquiz
žejlça.

4 ¹ Cristuqui žoñž curpuchiz
kamcan sufrichiça. Jalla
nižtiqiztan anchuczakaz sufrisjapa
listo cjis waquiziça. Anchucui
Cristužquiz kuzziz cjen sufraquiz
niqui, nižquin juc'anti macjataquicha.
Nižaza uj paaznacqiztan juc'anti
zarakaquicha. ² Jaziqini zuma
kamaquicha, tii muntuquiz
žejlcan. Yooz munañpi jaru juc'anti
kamaquicha; anawali pecñi kuz jaru
ana kamaquicha. ³ Anchucaquiz
cjuwça, anchuca tuquita kamtaqui ana
walitaça. Nužquizkaj cjila nii anawal
kamtaqui. Jalla niža anawal kamtaqui
ana criichi žoñinacaqui jutzaza.
Anchucui zuma zizza nii anawal
kamta puntu. Tuquiqui anchucui
anawal kuz pinziz jaru ojklayatça;
nižaza adulteriuquiz ojklayatça;
nižaza čjul kuz pecta jarumi paatça,
nižaza kuz katchi licatça, nižaza
ancha pijistanaca paatça, nižaza
mazinacžtan licz pecatça. Nižaza
žoñiž paata yooznacqiz rispitaça.
Werar Yooz mantita quintracha niqui.
⁴ Yoozquin kuzziz cjen, anchuca
kamtaqui anača iya nižtaqui. Jalla
nižtiqiztan anchuca tuquita mazinaca
anchucaquiztan istrañça, anchucaž
ana iya cumpant'ichiž cjen. Nekztan
anchucajapa inarça. ⁵ Pero ultim pjalz
tjuñquiz ninacaqui persuna anazuma
kamtiqiztan Yoozquin cuenta
tjaastança, Yoozqui ticzi žoñinacami
žejtñi žoñinacami ultimquiziqui
pjalznaquicha, tii yokquiz jaknužt
kamčhaja, jalla niit jama. Yoozqui
listo žejlça žoñinaca pjalzjapa. ⁶ Tii
muntuquiz žejlñi žoñinacžquiz liwriiñi
Yooz takuqui paljaytataça, ninaca
criyajo, nižaza liwriita cjeajo. Žoñž
curpuchiz cjen criichinacaqui tjapa
žoñinaca irata ticža. Pero ninacž
animunacaqui Yooziž arajpachquin

kjawžta cjen zumapan kamčha Yooz irat kamañchiz.

⁷Jilanaca, cullaquinaca, tii timpuqui otčha, wajillaž tjappacha čhjultakinacami tucuzinznacuičha. Pero ana kuz turwayzita cjee. Zuma pinsiñi cjee. Nižaza persuna kamz ewjazñi cjee, Yoozquin mayizican. ⁸Jalla tužučha chekanaqui, porapat zuma munaziñi kuzzizpankaz cjee. Zuma munazican, parti žoñinacž ujnac puntuquiztan ana ancha cjuñasačha. ⁹Porapat ančhuca kjuyquiz zumapanž risiwasaquičha, ana paysnakžcu.

¹⁰Yoozqui criichi žoñinacžquiz tjapaman zuma kamañanaca tjaačha. Nii kamañanacchiz porapat yanapasaquičha, juc'ant zuma kuzziz cjisjapa. Nižta pecčha učhum Yooz Jiliriqui. ¹¹Jakziltat paljayz kamañchiz žejlčhaja, panž Yooz taku paljayz waquizičha. Jakziltat yanapñi kamañchiz žejlčhaja, panž Yooz tjaata aztan yanapz waquizičha. Tjapa ančhucqui čhjul kamañchizimi Yooz honora juc'ant waytiskatčha, Jesucristuž cjen. Yoozqui wiñayjapa honorchiz cjila. Nižaza Yoozqui wiñayjapa mantiñej cjila. Jalla nužoj cjila. Amén.

PRUEBANACAŽ TJONANAMI CUNTINTUŽ CJEE

¹²Pecta jilanaca, cullaquinaca, anawal pruebanacaž tjonan ana tsuca. Ančhuc yanzjapakaz tjončha, Yoozquin zuma tjurt'iñi kuzziz, ana tjurt'iñi kuzziz, jalla nii yanzjapa. Nižta pruebanacaqui panž želaquičha. Anaž istraña. ¹³Jaknuž Jesucristuqui sufritchaja, jalla nižtazakaz ančhucqui sufraquičha. Jalla nižtiquiztan nižta pruebanaca tjonchiž cjen, cuntintuž cjee. Nižaza Jesucristuž tjonz tjuñquiz ančhucqui juc'anti cuntintuž cjequičha.

Nekztan Jesucristuqui niž aztan niž honora tjeeznaquičha. ¹⁴Cristužquin kuzziz cjen ančhuca quintr ch'aanita cjequičha. Pero ančhucqui cuntintuž cjee. Zuma Yooz Espíritu Santuqui ančhuca kuzquiz žejlčha. Ančhuca quintr žoñinacaqui Cristuž quintr chiičha. Ančhuczi Cristuž honora waytičha. ¹⁵Nonžna ančhucqui. Anačha žoñi conzqui. Anačha tjañi zaazqui. Anačha uj paazqui. Anačha yekja žoñž asuntuquiz mitizizqui. Nižta ana walinaca paaquiz niiqui, sufračhani. Pero nižta ana walinaca anapan paaquičha. ¹⁶Zuma cristiano cjican sufraquiz niiqui, ana azasačha. Antiz Yoozquin panž honora tjeeznaquičha, Cristuž partiquiz žejltiquiztan.

¹⁷Yoozqui niž famillchiz žoñinaca jusjiñi kalltičha, azquichta kamañchiz cjisjapa. Učhumqui tii muntuquiz žejlcan sufraquiz niiqui, čkjažt ana criichi žoñinacžtajapa wataquejo? Ninacaqui Yooz liwriñi taku anapanž cassa. Jalla nižtiquiztan infernuquin wiñayjapa sufraquičha. ¹⁸Zuma kamañchiz žoñinacaqui ch'aman anawalinacquiztan liwriitačha. Jalla nižtiquiztan ana criichi žoñinacžquiz nižaza uj paañi žoñinacžquiz kjaž cjitat cjequejo? Infernuquin wiñayjapa sufraquičha. ¹⁹Jalla nižtiquiztan tii muntuquiz kamcan criichi žoñinacaqui Yooz munañpi jaru sufričha. Jalla nižta sufričan Yoozquin kuzzizpan cjee, niž cuitita cjisjapa. Tii muntu paañi Yoozza litituma cuitiñiqui. Ancha zumapančha.

CRIICHI ŽOÑINACŽQUIZ CHIIŽINTA TAKU

5 ¹Icliz jilirinaca, ančhucaquin zuma tawkžtan chiižinžcučha. Wejrqui icliz jilirizakaztčha. Persunpacha Jesucristo sufriñi

cherchinča. Nižaza wejrqui parti criichi žoñinacžtan chica honorchiz cjeeča, Jesucristo wilta tjonz tjuñquiz.

²Tjapa ančhucqui Yoozquin criichi žoñinaca zuma cwitaquiča, zuma uuza awatirižtakaz. Tjapa kuztan nižaza zuma kuztan cuitiz waquiziča. Jalla nižta pecča Yoozqui. Anača paaz ganzjapakaz iclizziz žoñinaca cuitaquiča, pero Yooz sirwican tjapa kuztan cuitiz waquiziča. ³Anača tsjii ana zum patruñažtakaz cjiicjisqui, ančuca icliz žoñinacžtaqui. Antiz parti criichi žoñinacžquiz zuma kamaña tjezna, ninaca nižta iratapacha zuma kamkatzjapa.

⁴Nekztan chekan jilir Awatiriqui tjonžcu ančucaquiz zuma honoraž tjaaquiča, zuma premiožtakaz. Tsjii chjañiquiztan paata premiuqui ratulla tucuzinzasača. Ančuca honora ana tucuzinzasača. Ančhucqui Yoozquin criichi žoñinaca zuma cuititiquiztan jalla nižta honora tanznaquiča.

⁵Ančhucqui tjoťjowanaca, icliz jilirinacž jaru cjee. Nižaza tjapa ančhucqui porapat humilde kuztan rispitasaučiča. Yoozqui mita kuzziz žoñinacž quintracha. Pero humilde kuzziz žoñinacžquiz yanapča.

⁶Jalla nižtiquiztan tjapa azziz Yooz Jilirž mantuquiz humilde kuzziz cjee, nekztan Yoozqui ančucaquiz honorchiz cjiskataquiča. ⁷Yoozqui ančhuc cuitiča. Jalla nižtiquiztan čhjul llaquinacami nižaza kuz turwayskatñinacami nižquin kuzziz cjee.

⁸Pinsiñi kuzziz cjee. Nižaza naynay žela. Ančhuc quintru diabluqui ojklayča, anawal leona ajuticanžtakaz.

Nii anawal diabluqui ančucaquiz atipz pecča. Nižaza criichi žoñinaca Yoozquiztan zarakskatz pecča.

⁹Jalla nižtiquiztan niž quintra tjurtichi žela. Jesucristužquin kuzziz tjurt'ichi žela. Ančhucqui zizza, tii muntuquiz kamcan tjapa criichi jilanacaqui sufristanča. Jalla nižta zizcu, Jesucristužquin tjapa kuzziz cjen tjurt'ichi žela. ¹⁰Ančhuc tsjii zkoloc sufritan, Yoozqui ančucaquiz yanapaquiča, juc'ant zuma kamañchiz cjisjapa. Nižaza Yoozqui ančucaquiz tjurt'iñi kuzziz cjiskataquiča, nižaza tjup kuzziz cjiskataquiča, čhjul ana walquiztanami atipajo. Nii Yoozza zuma yanapñiqui. Niiqui učhum kjawziča, Jesucristužtan chica arajpachquin kamzjapa, wiñayjapa honorchiz cjisjapa. ¹¹Nii Yoozqui wiñayjapa honorchizkaj cjila. Wiñayjapa mantiñej cjila. Jalla nužoj cjila. Amén.

¹²Wejrqui ančucaquin tii kolta cartal Silvanužquiz cjijskatuča. Silvano jilaqui zuma lijitum jilača, cjiwča. Tii cartiquiz ančucaquin chiižinžcuča, nižaza Yooz lijitum okzñi kuz puntu paljayžcuča. Jalla nii puntunaca zizcu tira tjurt'iñi kuzziz cjee.

¹³Babilonia wajtquin icliz žoñinacaqui ančucaquin tsaanžquiča. Ninacaqui Yooz illzta žoñinacazakazza. Nižaza Marcos ančucaquin tsaanžquiča. Marcossa wejt maatižtakaz. ¹⁴Ančhucqui porapat zuma munaziñi kuztan tsaanasaquiča. Tjapa ančhucqui, Cristuž partiquiz žejlñinaca, walikaj cjila. Jalla nužoj cjila. Amén.